



# ВЫЛЬ СІЗЕН



ОТДЕЛ  
РЕЛИГИОЗНОГО  
ОБРАЗОВАНИЯ

ПАВЕЛ АПОСТОЛЛЭН  
КОРИНФ КАРЫН УЛЙСЬЁСЛЫ  
ЫСТЭМ НЫРЫСЕТІ ГОЖТЭТЭЗ

1-тй ЛЮКЕТ

<sup>1</sup>Инмарлэн эрикеныз Иисус Христослы апостол луыны өтем Павеллэсь но Сосфен братмылэсь, – <sup>2</sup>Инмарлэн Коринфысь черкезлы, Иисус Христос пыр дун-сьöлыктэм луэмьёслы, вöсяськисьёс радэ өтемьёслы, – вань интыосын улйсьёслы, киньёс Кузё-Инмарлы Иисус Христослы оскыса йыбыртто – соослэн но, асьмелэн но Кузё-Инмармылы. <sup>3</sup>Инмар Атаймылэн но Кузё-Инмарлэн Иисус Христослэн дэлетэз но каньыллыкез ваньдылы мед луоз.

<sup>4</sup>Тй понна дугдылытэк Инмарлы тау карисько: Иисус Христос пыр Инмарлэн тйледлы сётэм дэлетэз понна, <sup>5</sup>малы ке шуоно, Иисус Христос бордын тй котьмаин узырмиды – котькыче кылэн но, котькыче тодон-валанэн но. <sup>6</sup>Христос сярысь тодытон тй пушкын юнматскиз. <sup>7</sup>Озы, Кузё-Инмармылэсь Иисус Христослэсь лыктонзэ возмаса улыкуды, табере тйляд дэлет-кузьым басьтонын но кыче кулэяськонды öвöл ини. <sup>8</sup>Со тйледыз пумозяз юнматоз, Кузё-Инмармылэн Иисус Христослэн лыктон нуналаз дун-шектэмесь мед луоды шуыса. <sup>9</sup>Оскиськымон Инмар, Со тйледыз Аслаз Пиеныз Иисус Христосэн Кузё-Инмаренымы кусып возыны öтиз.

<sup>10</sup>Агай-выньёсы, Кузё-Инмармылэн Иисус Христослэн нимыныз тйледыз сюлворыса курисько: ваньды тй огкылысь улэ, куспады люкиськылонъёс медаз луэ. Одйг духен, одйг малпанъёсын тй гер-  
 заськемын мед луоды. <sup>11</sup>Хлоиялэн гуртоосыз пыр, агай-выньёсы, мыным тодмо луиз, тй куспын ченгешонъёс вань шуыса. <sup>12</sup>Мон вераны турттйсь-  
 ко та пумысен: тй пöлысь одйгез шуэ: ”Мон Павеллэн”; мукетыз – ”Мон Аполлослэн”; куинетйез – ”Мон Кифлэн”; ньылетйез – ”Нош мон Христослэн”. <sup>13</sup>Христос люкиськиз шат? Тй понна Павел кортчогазыкшиз шат? Яке, Павеллэн нимыз понна-а тйледыз пылатйзы? <sup>14</sup>Инмарлы тау карисько, Криспен Гаиез сяна, тй пöлысь нокинэ но öй пылаты. <sup>15</sup>Нокин но вераны уг быгаты соосты мон аслам нимы понна пылатй шуыса. <sup>16</sup>Стефанлэсь семьязэ пылатй на; эшшо кинэ ке пылатй на-а, – тодам уг лыкты. <sup>17</sup>Уго Христос монэ пылатыны öз ысты, Со монэ Зеч Ивор тодытыны ыстйз, адями визьлыкшэн чебер кыльёсыныз öвöл, – Христослэн киросэзлэсь кужымзэ быдтонтэм понна.

<sup>18</sup>Уго быронэ суроноослы кирос сярысь вераськод ке, – визьзэ ыштэм, шуо, нош асьмелы, утиськон сюрес вылтй мынйсьёслы, кирос – со Инмарлэн кужыме. <sup>19</sup>Гожтэмын уго:

”Визьнодоослэсь визьлыкшэс быдто, валасьёслэсь валанзэс палэнтэ”.\*

<sup>20</sup>Кытын визьнодоос? Кытын трос тодйсьёс? Кытын та даурлэн философьёсыз? Та дуннелэсь визь-

\* 1:19 Ис. 29:14.

лыксэ визьтэмьяськон луэ шуыса Инмар өз возьматы-а? <sup>21</sup>Уго, кукке дунне аслаз визьмыз пыр Инмарлэн визьмолэсь визьмолыкеныз Инмарез тодманы өз быгаты, – соку осконтэм тодытонлы окисьёсты утыны Инмар мылкыд кариз. <sup>22</sup>Иудейёс паймымон ужъёсты мед возьматомы шуыса куро, нош еллинъёс – визьлык утчало. <sup>23</sup>Нош ми кортчогам Иисус сярысь тодытйськомы, – иудейёс понна со канжаськон из, нош еллинъёс понна – осконтэм вераськон. <sup>24</sup>Нош асьсэлы, Инмарлэн өтемъёсызлы, иудейёслы но, еллинъёслы но, Христос – со Инмар кужымез возьматйсь, Инмар бордысь потэм визьмолык; <sup>25</sup>малы ке шуоно, Инмарлэн ”визьмотэмез” но адямиослэсь визьмогес, Инмарлэн ”кужымтэмез” но адямиослэсь кужмогес.

<sup>26</sup>Агай-выньёсы, тодады вае ай кычөөсь тй вал, кукке тйледыз Инмар өтиз: тй пöлын трос дышеткемъёсыз но уно öй вал, кужмо кивалтйсьёсыз трос öй вал, йöноосыз но трос öй вал. <sup>27</sup>Нош Инмар, визьмоосты возьытэ вуттон понна, дуннелэсь визьмо луисьтэмзэ бырйиз. Кужмо луисез возьытэ вуттон понна, Инмар дуннелэсь кужмо луисьтэмзэ бырйиз. <sup>28</sup>Инмар бырйиз сиё-дано луисьтэмзэ, ултйямъёсты, номырин но тодмо луисьтэмзэ, – адямиослэсь малпам нимо-дано луоноез быдтон понна, <sup>29</sup>нокин но Инмар азын медаз ушьяськы шуыса. <sup>30</sup>Инмарлэн юрттэменыз, тй али Христос Иисус борды герзаськемын, Со Инмар бордысен потэм асьме понна визьмолэсь визьмолык, шонерлык, дун-сьöлыктэм улон но

сьöлыкьёслэсь мозмытскон луэ. <sup>31</sup>Священной Гожтэмын кадь мед луоз: ”Ушьяськиськод ке, Кузё-Инмарен ушьяськы”.

## 2-тй ЛЮКЕТ

<sup>1</sup>Агай-выньёсы, куке мон тй доры Инмарлэсь тодытонзэ ивортыны лыктй, мынам вераськонэ чебер кыло, мудроно öй вал. <sup>2</sup>Кортёогам Иисус Христосэз сяна, номыре но тодытэк улыны малпай тй дорын. <sup>3</sup>Катътэммыса, кышкаса, туж куалекьяса мон тй дорын улй. <sup>4</sup>Чебересь, мудрон кыльёсын вераськыса, тодытыса осконэз öй юнматы, Дух татын Аслэсьтыз кужымзэ возматйз. <sup>5</sup>Тйляд осконды адями визьлыкен öвöл, Инмарлэн кужыменыз мед юнматскоз.

<sup>6</sup>Визьлыкез быдэ вуэмьёс пöлын тодытйськомы, но со та даурлэн но та даурын кулйсь-бырись кивалтйсьёслэн визьлыксы öвöл. <sup>7</sup>Ми тодытйськомы Инмарлэсь бадзым визьлыксэ, кудйз та дырозь ватйськыса, усьтйськытэк улйз но, кудзэ Инмар вань вапумьёслэсь азьвыл ик асьмелы данлыке пырон понна дасяз. <sup>8</sup>Инмарлэсь визьлыксэ та даурлэн кивалтйсьёсыз пöлысь одйгез но öз тодма; тодмасалзы ке, данлэсь Кузё-Инмарзэ öй кортёогасалзы уго. <sup>9</sup>Но кызыы гожтэмын:

”Мае син но öз адзы, пель но öз кылы, адямилэн сюлмаз-визьмаз но öз пырылы, мае Инмар Сое яратйсьёслы дасяз”.\*

\* 2:9 Ис. 64:4.

<sup>10</sup>Нош милемлы тае Инмар Аслаз Духеныз усьтйз; уго Дух котьмае но пыдэсозяз эскере, Инмарлэсь ватйськем мурдалаоссэ но. <sup>11</sup>Уго адямиос пöльсь кин тодэ адями пушкын мар вань, адями дух сяна, кудйз со пушкын улэ? Озыы ик Инмарлэсьсэ но нокин но уг тоды, Инмарлэн Духез сяна. <sup>12</sup>Инмарлэсь милемлы вань сётэмзэ тодон понна, та дунелэсь духсэ кабыл öм басьтэ, Инмарлэсь Духсэ кабыл басьтймы, <sup>13</sup>адями визьмын дышетэм кыльёсын ум тодытйське, Святой Дух пыр дышетэм кыльёсын, духовнойзэ духовноен валэктыса-эскерыса тодытйськомы. <sup>14</sup>Адями, кудйз бордын Инмарлэн Духез уг улы, Дух пыр дышетэм кыльёсты кабыл уг басьты, малы ке шуоно, тае со осконтэм уж шуыса лыдья, – со валаны но уг быгаты, уго тае Духлэн юрттэменыз гинэ эскерыны-дуньяны луэ. <sup>15</sup>Духовой адями гинэ котьмае шонер эскерыны-дуньяны быгатэ, нош сое нокин но шонер эскерыны-дуньяны уг быгаты. <sup>16</sup>Уго Кузё-Инмарлэсь визьзэ валаны-тодыны кин быгатэ? Кин быгатэ Сое дышетыны? Нош асьмелы Христослэсь визь сётэмын.

### 3-тй ЛЮКЕТ

<sup>1</sup>Агай-выньёсы, духовной адямиослы кадь мон тйледлы öй тодыты, лулмугорлэн куроньёсызья улйсьёслы, Христос бордысь вож нуныослы кадь тодытй. <sup>2</sup>Чурыт сиёнэн öй сюды, мон тйледыз йöлын сюдй, тй уго эшшо кужымтэмесь на вал,

али но кужмоесь өвёл на, <sup>3</sup>малы ке шуоно, тй лулмугорлэн куроньёсызъя улйськоды на. Уго тй куспын вань ке вожьяськон-ченгешон но керетоньёс, – лулмугорлэн куроньёсызъя улйсьёс өвёл-а тй, адями йылолъёсья-сямьёсья тй уд лэсьтйське-а? <sup>4</sup>Уго, куке огез шуэ: ”Мон – Павеллэн”, нош мукетыз: ”Мон – Аполлослэн”, соин ик тй лулмугорлэн куроньёсызъя улйсьёс өвёл-а? <sup>5</sup>Кин со Павел? Кин со Аполлос? Соос ужась-тыршись ляльчиос гинэ, кудьёсыз пыр тй оскыны кутскиды. Ми лэсьтймы сое, мае милемлы Кузё-Инмар сётйз. <sup>6</sup>Мон мерттй, Аполлос ву киськаз, нош будэтйз – Инмар. <sup>7</sup>Мерттйсь но, ву киськась но – олокинъёс ик өвёл, будэтйсь Инмар гинэ – ваньмызлэсь вылй. <sup>8</sup>Мерттйсь но, ву киськась но одйг ужез лэсьто. Соос котькудзы ужамзыя уждун басьтозы. <sup>9</sup>Ми – Инмарлэн ужасьёсыз, нош тй – Инмарлэн бусыез, Инмарлэн лэсьтэм-пуктэмез.

<sup>10</sup>Инмарлэн мыным сётэм дэлетэзъя, усто лэсьтйськись кадь, мон иньетсэ пуктй, нош мукетыз со ужез азинтоз. Котькудйз но сак мед учкоз, кызы со лэсьтоз-пуктоз. <sup>11</sup>Иньет – со Иисус Христос, со иньет пуктэмын ни, табере мукетыз кулэ өвёл ини. <sup>12</sup>Та иньет вылэ корка жутэ ке, – зарнилэсь, азвесьлэсь, дуно изьёслэсь, пулэсь, турынлэсь, куrolэсь, – <sup>13</sup>котькудйзлэн ужез одйг пол, – Христос лыктон нуналэ тодмо луоз: уго со нунал тылын усьтйськоз, нош со тыл котькудйзлэсь ужзэ эскероз-чаклалоз, – ярамон-а, ярантэм-а со уж. <sup>14</sup>Кинлэн коркаез быдэс кылёз, со мурт мед-кузьым басьтоз. <sup>15</sup>Кинлэн коркаез жуаз, со мурт изьян

адзоз; нош ачиз утиськоз, тыл пушкысь утись-  
кисьёс кадь. <sup>16</sup>Уд тодйське шат тй Инмарлэн хра-  
мез луиськоды, но Инмарлэн Духез тй пушкын  
улэ шуыса? <sup>17</sup>Кин Инмарлэсь храмзэ куашкатэ,  
со муртэ Инмар куашкатэ, уго Инмарлэн храмез  
святой; нош тй – Инмарлэн храмез.

<sup>18</sup>Нокин но ассэ ачиз медаз пöя: тй пöлысь кин  
ке таяз дуннеын ассэ визьмо шуыса лыдья, зэмзэ  
ик визьмо луон понна, со ассэ визьтэм шуыса  
мед лыдьялоз. <sup>19</sup>Мае адямиос визьмо шуыса  
лыдьяло, со Инмар дорын укылтэм шуыса лыдь-  
яське. Гожтэмын уго: "Визьмоосты Инмар кескич  
уж лэсьтыкузы кутылэ". <sup>20</sup>Тазы но гожтэмын:  
"Кузё-Инмар тодэ визьнодоослэн но малпаньёссы  
– юнме алекьяськон гинэ луэ шуыса". <sup>21</sup>Соин ик  
адямиосын нокудды но эн ушьяське, уго ваньмыз  
– тйляд. <sup>22</sup>Павел но, Аполлос но, Кифа но, таиз  
дунне но, улон но, кулон но, туннэ нунал но, вуо-  
ноез вапум но – ваньмыз тйляд; <sup>23</sup>нош тй – Хрис-  
тослэн, нош Христос – Инмарлэн.

#### 4-тй ЛЮКЕТ

<sup>1</sup>Озыен, ваньмыз мед адзоз ми Христослэн  
ужасьёсыз-ляльчиосыз луиськомы, милемлы Ин-  
марлэсь ватйськыса улйсь зэмлыкьёссэ утыны  
сётэмын шуыса. <sup>2</sup>Нош кинлы со оскыса сётэмын,  
со мурт оскиськымон луыны кулэ. <sup>3</sup>Мыным но-  
кыче но уг поты, кызьы тй монэ судить карись-





коды, яке кызыы мукет адямиос судить каро; мон ачим но асме судить уг кариськы. <sup>4</sup>Тодйсько, съолько-урод ужъёсы өвёл, но озыы ке но мон асме шонере поттыны уг выриськы, Кузё-Инмар уго мыным судья. <sup>5</sup>Соин ик, Кузё-Инмар лыктытозь, дырыз вуытэк, нокинэ, ноку но судить эн каре. Пеймыт азе ватйськемез Со югдытоз но сюрэм-лэсь малпанъёссэ шарае поттоз. Соку котькудзэ, солэн ужезъя Инмар ушъялоз, сйлы кароз.

<sup>6</sup>Тае мон, агай-выньёсы, ачим сярысь, Аполлос сярысь верасько, тйледлы зеч мед луоз шуыса, милесьтым адзем карыса, тй мед дышысалды валаны та кыльёсты: "Мар гожтэмын, солэн съобраз-потыны уг яра", вылтйяськисез-ушъяськисесь медад луэ, одйгзэ адямиез мукетызлэсь вылье медад пуктэ шуыса. <sup>7</sup>Зэмзэ ик, кин тонэ вылье пуктйз? Маид тынад вань, ваньзэ сое тыныд Инмар өз сёты-а? Нош басьтйд ке, мар бен ушъяськиськод, – ваньмыз со кузьым өвёл шат? <sup>8</sup>Тйляд котьмарды вань ини, тй узырмиды ни. Тй митэк эксэй луиды ни. Э, кыче мынам потэ, – зэмзэ но тй эксэйёс мед луысалды! Ми но тйледын чош эксэйёс кадь мед кузёяськысалмы! <sup>9</sup>Мон малпасько, милемды, апостольёсты, ваньмызлэсь сйтэм-сантэм, виыны сётэм адямиосты кадь Инмар кариз, малы ке шуоно, ми шоры быдэс дунне, кылчинъёс но, адямиос но учкыса уло. <sup>10</sup>Христос понна ми "визь-тэмьёслы" пөрмимы, нош тй "визьнодо" христианъёс; ми катътэммемын, нош тй кужмоесь; тй дан пöлын улйськоды, нош ми – антэман пöлын. <sup>11</sup>Туннэ нуналозь но ми кöтмы сямаса, сюмы

куасьмыса улійськомы, зустари дійскутэн вет-  
лійськомы, жугон-чапконэз чидаськомы, йырмес  
паныны коркамы өвөл. <sup>12</sup>Но ужаськомы, асьме  
киосынымы тыршиськомы. Ми сярысь урод кыль-  
ёс верало, ми соосты бакель кариськомы; миле-  
мыз улляло, ми чидаськомы; <sup>13</sup>милемыз тышкась-  
ко, нош ми соос понна вёсяськиськомы; дунне  
понна ми жуг-жаггёс луимы, пыд улысь сую, кудзэ  
туннэ нуналозь ваньмыз лёгаса кошко.

<sup>14</sup>Тйледыз возытэ вуттон понна тае уг гожтйсь-  
кы, гожтйсько аслэсьтым яратоно нылпиосме  
визьман понна. <sup>15</sup>Христос бордын тйляд сюрс ке  
но дышетйсьёсты, нош атайёсты трос өвөл: мон  
тйледыз, Зеч Ивор тодытыса, Иисус Христос  
бордын вордйськытй. <sup>16</sup>Соин ик тйледыз сюлво-  
рыса курисько: кызы мон Христослэсь адзем  
карьско, озы тй но мынэсьтым адзем каре. <sup>17</sup>Со  
понна ик мон тй доры Тимофеез ыстй, Кузё-Ин-  
мар бордысь аслэсьтым яратоно, оскиськымон  
пиме. Со тйледлы Иисус Христос бордын улэме-  
тыршеме сярысь вералоз, кызы мон котькытын,  
вань черкьёсын дышетйсько. <sup>18</sup>Тйляд куд-оггёсыз  
вылтйяськыны кутскизы ни, соос уго малпазы мон  
тй доры уг ни лыкты шуыса. <sup>19</sup>Инмарлы кулэ ке  
луиз, жоген мон тй доры лыкто. Соку вылтйясь-  
кисьёслэсь кыльёссэс уг эскеры-чакла, соослэсь  
кужымзэс эскеро-чаклало. <sup>20</sup>Уго Инмарлэн Эксэй-  
лыкез чебер кыльёс бордын өвөл, со кужым бор-  
дын. <sup>21</sup>Кызы тйледлы кулэ? Тй доры ньёрын-а,  
яке яратонэн, востэм-зйбыт духен-а мыным лык-  
тоно?

## 5-тй ЛЮКЕТ

<sup>1</sup>Тй пöлын азыса-калгыса улон потэм шуыса кылйськиз, – сыче азыса-калгыса улон, кычезэ язычникъёс пöлысь но уд кылы: кин ке но ас атаезлэн кышноеныз азыса-сьöлыкаса, пе, улэ. <sup>2</sup>Со понна куректыны кулэ, нош тй вылтйяськыны öдъяды. Таچه ужез лэсьтйсь тй пöлысь уллямын мед луоз. <sup>3</sup>Мугорыным тй пöлын öвöл ке но, нош духеным мон тй пöлын. Тй пöлын улйсь мурт кадь, тазы карыны малпай: таچه уж лэсьтйсьез, <sup>4</sup>асьтэлэн кенешады Кузё-Инмармылэн Иисус Христослэн ни-мыз понна люкаськиды ке, мынам духе тй пöлын луиз ке, соку Кузё-Инмармылэн Иисус Христослэн кужыменыз, <sup>5</sup>та адямилэсь мугорзэ шайтанлы пыргытыны сётэ, – Кузё-Инмармылэн Иисус Христослэн лыктон нуналаз солэн духез утемын мед луоз шуыса. <sup>6</sup>Тйледлы номырин ушгьяськыны. Уд тодйське шат пичи гинэ шöм быдэс шумес нянез чыршатэ шуыса? <sup>7</sup>Озыен, тй выль ныркем нянь мед луоды шуыса, вуж шöмлэсь чылкытатйське, – тй шöмтэм, чырсатымтэ нянь. Асьмелэн Быдзымнунал Ыжпимы, Христос, асьме понна курбон сётэмын. <sup>8</sup>Соин ик, ваелэ Быдзымнуналэз пумиталоме, но вуж шöмен ум, урод, кескич улонлэн шöменыз но ум, ваелэ юмал нянен пумиталоме – чылкытлыко, зэмлыко улонэн.

<sup>9</sup>Ыстэм гожтэтам мон тйледлы гожъяй – азыса-калгыса улйсьёсын кусып эн возе; <sup>10</sup>та дуннеысь вань азыса-калгыса улйсьёсын, узырлык капырь-ясьёсын, адями таласьёсын, сульдэръёслы-идоль-

ёслы йыбыртъясьёсын уг шуиськы, – соку тйледлы та дуннеысь кошкыны кулэ луысал. <sup>11</sup>Мон тйледлы гождьяй: кусып эн возе соин, кин агай-вын шуыса нимаське, нош ачиз азыса-калгыса улонлэсь, узырлык капыръянлэсь, сульдэръёслы-идольёслы йыбыртъянъёслэсь, лек кылын вераськонлэсь, адями таланлэсь уг куштйськы. Таёе муртэн огазын сиськыны но уг яра. <sup>12</sup>Мар мыным педлосьэ, оскымтэосты судить каронэз? Пушкисьёссэ, черк адямиосты тй судить каре. <sup>13</sup>Педлосьёссэ Инмар судить кароз. Гожтэмын: ”Уродэз-лекез пöлысьтыды уллялэ.”

#### 6-тй ЛЮКЕТ

<sup>1</sup>Кызы тй дйсьтйськоды, мукет муртэн споре пырыкуды, вöсяськись калыклы öвöл, оскисьтэмъёслы ченгешон уждэс возьматыны? <sup>2</sup>Тй уд тодйське шат, дуннеез вöсяськись калык судить кароз шуыса? Тйледлы дуннеез судить кароно бере, чыры-пыры ужёсты асьтэ куспын сэрттыны-пертчыны уд быгатйське шат? <sup>3</sup>Тй уд тодйське шат, асьмеос кылчинъёсты судить каромы шуыса? Нош улон куспысь чыры-пыры ужёсты ум-а быгатйське сэрттыны-пертчыны? <sup>4</sup>Улон куспады ченгешонъёс луэ ке, оскисьтэм адямиосты асьтэлы судьяе пуктйськоды. <sup>5</sup>Тйледлы возыт мед луоз шуыса верасько: тй пöлын одйг но визьноез öвöл шат, кудйз агай-вынъёс куспысь ченгешонэз сэрттыны-пертчыны мед быгатысал? <sup>6</sup>Агай-вынъ-

ёс огзы вылэ огзы судэ сёто, нош та ужез Инмарлы оскисьтэмьёс сэртто-пертчо. <sup>7</sup>Огдэс огды судэ сётыса, тй быдэсак сйдэс-сандэс ыштйськоды. Малы котжожьёсты чидамды уг поты? Ыштоньёс-курадзоньёс ке луо, малы бен тйледлы сое но чидантэмез – огдэ огед судэ сётытозь. <sup>8</sup>Нош тй огдэс огды ултйяськоды, таласькоды, эшшо ке, агай-выньёстэс ик. <sup>9</sup>Оло нош тй уд тодйське, шонер улйсьтэмьёс Инмар Эксэйлыке уз пыре шуыса? Öрекчаськон пöлы эн йыроме: азыса-калгыса улйсьёс но, сульдэрьёслы-идольёслы йыбыртьясьёс но, мурт пиосмуртэн яке мурт кышно-муртэн сьöлыкасьёс но, кынызы азон сьöлык лэсьтйсьёс но, пиосмуртэз кышномурт карыса кöласьёс но, <sup>10</sup>лушкаськисьёс но, мурт ваньбурез капырьясьёс но, юисьёс но, урод кылын вераськисьёс но, сьöсь муртьёс но – Инмар Эксэйлыке уз пыре!

<sup>11</sup>Тй пöлын но куд-огез сычөөсь ик вал, – гылтйськиды, дун-сьöлыктэм луиды но Инмармылэн Духеныз, Кузё-Инмармылэн Иисус Христослэн нимыз понна шонере потйды.

<sup>12</sup>Мыным котьмар лэсьтыны лэземын, но ваньмыз мыным пайда уг вайы. Мыным котьмар лэсьтыны лэземын, но соос пöлысь номыр но монэ вормыса улыны кулэ öвöл. <sup>13</sup>Сиён кöт понна, кöт сиён понна. Нош Инмар соизэ но, таизэ но быдтоз. Мугор азыса-калгыса сьöлык лэсьтон понна кылдытэмын öвöл, – со Кузё-Инмар понна кылдытэмын, Кузё-Инмар мугорлы но кузё луэ. <sup>14</sup>Инмар Аслаз кужыменыз Кузё-Инмарез улзытыса султытйз, асьмеды но Аслаз кужыменыз улзытыса

султытоз. <sup>15</sup>Уд тодйське шат тйляд мугорёсты Христослэн мугор люкетъёсыз луо шуыса? Озыен, Христослэсь люкетсэ талалом но, азыса-калгыса улйсь кышномуртлы люкет карон понна сётон-а? Озы медаз луы! <sup>16</sup>Уд тодйське шат, азыса-калгыса улйсь кышномуртэн сьöлыке пырись мурт соин одйг мугор луэ шуыса? Шуэмын ук: "Кыкназы одйг мугор луозы". <sup>17</sup>Нош кин Кузё-Инмарен герзаське, со Кузё-Инмарен одйг кадь духен улэ. <sup>18</sup>Азон-калгон сьöлыкклэсь палэнске. Мукет вань сьöлыкъёс, кудъёссэ адями лэсьтэ, мугорлэн палэназ лэсьтйське, нош азон-калгон сьöлык лэсьтйсь аслаз мугорезлы пумит сьöлыка. <sup>19</sup>Уд тодйське шат, тйляд мугорды тй пушкын улйсь Святой Духлэн храмез луэ шуыса, Со тйледлы Инмар дорысь сётэмын. Тй асьтэлы асьтэос кузё öвöл, Инмар тйледлы кузё. <sup>20</sup>Тй уго дуно дун тырыса мозмытэмын-басьтэмын. Соин ик мугорыныды но, лулыныды но Инмарез данъялэ, уго соос Инмарлэн сётэмез луо.

### 7-тй ЛЮКЕТ

<sup>1</sup>Тй мыным гождяды, кудйз пумысен мон вераны быгатйсько: пиосмуртлы кышномурт борды йöтйськытэк улыны умойгес луоз. <sup>2</sup>Нош азон-калгон сьöлыке усентэм понна, котькудйзлэн мед луоз кышноез, котькудйзлэн мед луоз картэз. <sup>3</sup>Пиосмурт кышнозэ яратыса возыны кулэ; озы ик кышноез но картсэ. <sup>4</sup>Кышномурт аслаз муго-

рызлы кузё өвөл, картэз солы кузё. Озы ик пиосмурт но аслаз мугорызлы кузё өвөл, кышноез солы кузё. <sup>5</sup>Огдылэсь огды эн палэнскылэ, – визян но вöсяськон дырлы сяна, со пумысен ог-огеныды огкылысь луыса вакчи дыр ёже гинэ нимаз луэ. Нош со бере нош ик огазе кариське, чидамтэныды сэрен шайтан визьдэс медаз туга шуыса. <sup>6</sup>Тае мон мылкыд карыса гинэ тйледлы верасько, косыса уг. <sup>7</sup>Мылкыд карисько вань адямиос мон кадь мед улозы шуыса; но котькудйзлы Инмар нимысьтыз кузьым-дэлет сётэ: огезлы – одйг кузьым-дэлет, мукетызлы – мукет.

<sup>8</sup>Бызьымтэ-басьтымтэослы, кышнотэк-карттэк кылемъёслы верасько: мон кадь улйзы ке, умой луоз соослы. <sup>9</sup>Возиськыны уг ке чидало, мед бызёзы, басьтозы, уго бызьыны-басьтыны жуаткем мылкыдын пöсекьяса улонлэсь зечгес. <sup>10</sup>Бызем-басьтэмъёслы мон уг косйськы, Кузё-Инмар косэ: кышномуртлы картэныз люкиськыны уг яра. <sup>11</sup>Люкиськиз ке, бызьытэк кыльыны кулэ яке кузпалэныз тупаны, пиосмуртлы но аслэсьтыз кышнозэ куштыны уг яра. <sup>12</sup>Нош мукетъёсызлы, Кузё-Инмар уг шуы, мон шуисько: кудйзлэн ке агайвынлэн кышноез Инмарлы оскисьтэм ке, но со кышномурт картэныз улыны соглаш ке, та пиосмуртлы кышнозэ куштыны уг яра. <sup>13</sup>Кышномурт но, кудйзлэн кузпалыз Инмарлы оскисьтэм ке, но со соин улыны соглаш ке, солы картэс кельтыны уг яра. <sup>14</sup>Уго оскисьтэм пиосмурт оскись кышноез пыр дун-сьöлыктэм луэ. Оскисьтэм кышномурт но оскись картэз пыр дун-сьöлыктэм

луэ. Озы ке ой луысал, тйляд нылпиосты сьолькоесь луысалзы, нош али соос дун-сьольктэ-мель луэмын. <sup>15</sup>Инмарлы оскисьтэм муртлэн люкиськемез потэ ке, мед люкиськоз. Инмарлы оскись та учыре оскисьтэм кузпалэн герзаськемын өвёл ни. Асьмеды Кузё-Инмар тупаса улыны косйз. <sup>16</sup>Кышномурт, кызы тон тодйськод, карттэ уд уты шуыса? Яке тон, пиосмурт, кызы тон тодйськод, кышнодэ уд уты шуыса?

<sup>17</sup>Котькудйз озы мед улоз, кызы солы Инмар тупатйз, кызы Кузё-Инмар улыны косйз. Тазы мон вань черкёсты улыны косйсько. <sup>18</sup>Кин ке черке ветлыны кутскыкуз вандйськемын ни ке вал, вандйськемзэ ватыны медаз тыршы. Кин ке вандйськон сямез ортчытэмлэсь азьло черке ветлыны кутскиз, со мурт вандйськон сямез медаз ни ортчыты. <sup>19</sup>Вандйськон но номырлы кулэтэм, вандйськытэк кылён но номырлы кулэтэм, нош ваньмызлэсь дуноез – Инмарлэсь курон-косоньёссэ быдэсьян. <sup>20</sup>Кинэ кыче дыръяз Инмар отиз, сычөөн ик со мед кылёз. <sup>21</sup>Ляльчиын улон дыръяд тонэ Инмар отиз ке, ляльчи луэмедлэсь эн возьдаськы. Нош эрик басьтыны луонлыкед вань ик ке, басьты. <sup>22</sup>Уго Кузё-Инмарен өтем ляльчи, Кузё-Инмар азын эрико мурт, нош Кузё-Инмар отырку, тон эрико адями вал ке, табере тон Христослэн ляльчиез луиськод. <sup>23</sup>Тй дуно дун тырыса мозмытэмын; адямиослы ляльчи эн кариськы. <sup>24</sup>Агайвыньёсы, кин кыче дыръяз өтемын вал, Инмар азын ваньмыз со куенызы ик мед кылёзы.



<sup>25</sup>Сьӧлыкатэк ныл кылӧн пумысен Кузӧ-Инмарлэсь косон мон ӧй басьты, Солэсь мон оскиськымон луыны дӧлет басьтй, соин ик тйледлы визькенеш сӧтыны быгатйсько. <sup>26</sup>Та виысь шугадзӧньёсты лыдӧ басьтоно ке, адымылы бызъытэк-басьтытэк кельтйськыны жечгес луоз шуыса малпасько. <sup>27</sup>Кышнояськемын-а тон? – Люкиськон эн утча. Кышнотэк-а кылид? Кышно эн утча. <sup>28</sup>Кышнояськид ке но, сьӧлык уз луы. Сьӧлыке пырымтӧ ныл бызиз ке, солы сьӧлык уз луы. Но бызем-басьтэм муртъёс трос куректон-кайгуос чидано луозы, нош мынам тйледыз соослэсь утеме потӧ. <sup>29</sup>Агай-выньёсы, мон тйледлы верасько: дыр ӧжыт кылемын ини, соин ик кышноӧ муртъёс кышнояськымтӧ муртъёс кадъ улыны кулӧ. <sup>30</sup>Бӧрдйсьёс но бӧрдымтӧ муртъёс кадъ мед улозы; шумпотйсьёс но шумпотытэк улйсьёс кадесь; басьяськисьёс но мырзы ӧвӧлтэм муртъёс кадесь мед луозы. <sup>31</sup>Та дуннелэн жечлыкеныз улйсьёс жечлыкез адзымтӧос кадъ мед улозы. Уго таиз дунне ортче-быре. <sup>32</sup>Но кычӧ сьӧлмаськонъёс тйледыз ӧртыса медаз возе вал кадъ, мыным потӧ. Кышнояськымтӧ мурт Кузӧ-Инмарлэн ужъёсыз сярысь сьӧлмаське, кызы меда Кузӧ-Инмарлы ярамон луом шуыса. <sup>33</sup>Нош кышнояськем мурт та дуннелэнэз сярысь сьӧлмаське, кызы меда кышноелы ярамон луом шуыса. Бызем но бызъымтӧ нылъёс вискин вань пӧртэмлыкез. <sup>34</sup>Бызъымтӧ мурт Кузӧ-Инмарлэн ужъёсыз сярысь сьӧлмаське, кызы меда Солы ярамон луом шуыса; мугорын но, духен но дун-сьӧлыктэм луон сярысь со сьӧлмаське. Нош бызем

мурт та дуннелэнэз сярысь сюлмаське, кызьы ме-  
да кузпалэзлы ярамон луом шуыса. <sup>35</sup>Тйледлы  
пайда мед луоз шуыса тае верасько: тй вылэ  
кычес-сьёлтэт поныны уг малпаськы. Чылкыт  
сюлэмын, шонер улыса ялан Кузё-Инмар бордын  
мед улоды.

<sup>36</sup>Нылыд арескын быдэ вуэмын ни ке, но сое  
ныл куен воземед уг поты, соку лэсьты озьы, кы-  
зьи лэсьтэмед потэ, – уд сьёлыка, мед бызёз.  
<sup>37</sup>Нош кин сюлмыныз юн, шугадзонъёсын ёртэ-  
мын өвёл, ассэ кутыны кужымез вань, сюлмыныз  
со аслэсьтыз ныллыксэ утыны мылкыд кариз ке,  
– со умой лэсьтэ. <sup>38</sup>Соин ик аслэсьтыз нылзэ карт-  
лы сётйсь мурт зеч каре; нош сётйсьтэм мурт эш-  
шо но зечгес.

<sup>39</sup>Картэз улэп дыръя, кышномурт кузпалэныз за-  
кон пыр герзаськемын луэ, нош картэз кулйз ке,  
кинлы быземез потэ, солы быземез луэ, но со  
мед луоз Кузё-Инмарлы оскись мурт. <sup>40</sup>Нош  
мынам визь-кенешея бызьытэк улйз ке, со шудо;  
малпасько, мынам но бордам Инмарлэн Духез  
вань шуыса.

## 8-тй ЛЮКЕТ

<sup>1</sup>Сулдэръёслы-идольёслы виро сётон сиёнъёс  
сярысь ми тодйськомы, малы ке шуоно, ”милям  
ваньмылэн тодонъёсмы вань”. Тодон адымиез  
вылй мылкыдъем каре, нош яратон – кужым сё-  
тэ. <sup>2</sup>Кин малпа, со мар ке но тодэ шуыса, со уг на

тоды озьы, кызы тодыны кулэ. <sup>3</sup>Нош кин Инмарез яратэ, со адымез Инмар тодэ. <sup>4</sup>Сульдэръёслы-идольёслы виро сётэм сиён пумысен ке верано, ми тодйськомы: дунне вылысь сульдэр – со өвөлтэм маке. Одйг Инмар сяна, мукет инмар өвөл. <sup>5</sup>Шуом, (язычникъёслэн) я инмын, я музъем вылын вань куд-ог инмар шуонъёссы, – вань трос ”инмаръёссы” но трос ”кузёоссы”, – <sup>6</sup>нош асьмелэн одйг гинэ Инмармы – Инмар Атай. Со ваньзэ кылдытйз, асьмеос Со бордын ик улйськомы; одйг Кузё-Инмармы Иисус Христос, Со пыр ваньмыз улыны кутскиз, Со пыр асьмеос улон басьтймы.

<sup>7</sup>Но ваньмызлэн таёе тодонэз өвөл: куд-огез али но валанзы лябен сульдэръёслы йыбыртъясьёс луо, соос курбон сйлез сульдэръёслы сйзем сиён шуыса сйё, озьы соос асьсэды асьсэос саптало.

<sup>8</sup>Сиён асьмеды Инмарлы матэ уг кары: сиськиськомы-а асьмеос, номыр но соин зечсэ ум лэсьтйське; ум ке но сиськиське – номыр но уродзэ ум лэсьтйське. <sup>9</sup>Но чаклаське-утиське, тйляд сиёнэн бырйиськонды ляб муртъёс понна визь сынанлы медаз пөрмы. <sup>10</sup>Кин ке адзиз ке, кызы тон тодыса вылысь, вöсяськон куалаын, жöк сьöрын пукиськод, соку солэн но, ляб муртлэн мылкыдыз уз жутскы-а сульдэръёслы сётэм курбон сйлез сиыны? <sup>11</sup>Тынад таёе ”тодонэныд” сэрен быроз осконэн ляб мурт, – тынад братэд, кудйз понна Христос кулйз. <sup>12</sup>Тазы агай-вынъёслы пумит сьöлыкаса, соослэсь лябзем мылкыдзэс сöрыса, тй Христослы пумит сьöлыкаськоды. <sup>13</sup>Соин ик, сиён мынам братэлэсь визьзэ сына ке, братэлэсь визьзэ сынантэм понна, быдэс даурам сйль уг сиы.

## 9-тй ЛЮКЕТ

<sup>1</sup>Мон эрико адями өвөл-а? Мон апостол өвөл-а? Асьмелэсь Кузё-Инмармес Иисус Христосэз мон ой адзы-а? Кузё-Инмар пыр тй мынам быдэстэм уже өвөл-а? <sup>2</sup>Мукетгёс понна мон апостол өвөл ке, нош тй понна мон апостол луйсько; тйляд Кузё-Инмар бордын улонды мынэсьтым апостол луонме юнматэ.

<sup>3</sup>Монэ судить карисьёслы пумит та мынам ответэ. <sup>4</sup>Сиыны но юыны милям правомы өвөл шат? <sup>5</sup>Сузэрмес кышномес сьёрамы нуллыны ум быгатйське шат, кызыы нулло мукет апостольёс, Кузё-Инмарлэн братьёсыз, Петр? <sup>6</sup>Мон но Варнава гинэ ужаса кётмес тырыны кулэ-а? <sup>7</sup>Кыче солдат ачиз дун тырыса служить каре? Кин виноградпуд мерттоз но солэсь емышсэ сиыны уз дйсьты? Кин пудо возьмасьлы йёл сиыны уз лэзы? <sup>8</sup>Адями визьмын гинэ мон тае уг вераськы, тазыы ик Инмар закон но вера. <sup>9</sup>Уго Моисей законын гожтэмын: "Кутсаськись ошлэсь ымзэ эн кортна". Ошьёс сярись-а Инмар сьулмаське? <sup>10</sup>Асьме понна та верамын өвөл-а? Бен, та асьме понна гожтэмын; уго кин гыре, оскиськонэн мед гыроз, кин кутсаське, басьтоно люкетлы оскиськыса мед кутсаськоз. <sup>11</sup>Тй пушкы ми духлэсьсэ кизимы ке, тй дорысь кёттырон арамы ке, туж-а троссэ тй-лесьтыд куриськомы? <sup>12</sup>Мукетгёс тй-лесьтыд юрттэт курыны быгато ке, ми уката но быгатйськомы.

Нош ми номыр но ом куре, Христослэсь Зеч Иворзэ вёлмытон понна, ми котьмае но дась чиданы. <sup>13</sup>Тй уд тодйське шат святой ужез бы-

дэсьясъёс храме ваем сиён-юонэн кӧтсэс тыро шуыса? Курбон тыронын ужасьёс курбон тыронысь люкет басьто шуыса? <sup>14</sup>Кузё-Инмар но Зеч Иворез тодытсьёсты тазы ик Зеч Ивор тодытонэн кӧтсэс тырыса улыны косйз. <sup>15</sup>Но мон ужаментыршеме понна номыр аслым ой басьты. Аслым маке но со курон понна тае тйледлы уг гожтйськы. Маин мон ушьясъкыны быгатйсько, сое кин ке быдтыны быгатэ ке, мон дась кулыны. <sup>16</sup>Уго Зеч Ивор мон тодытйсько ке, мыным номырин ушьясъкыны, малы ке шуоно, та мынам долге; Зеч Иворез тодытэмысь дугдй ке, куректон-кайгу мыным луоз. <sup>17</sup>Уго тае мон нокин косытэк лэсьтйсько ке, со понна мон Инмар дорысь мед-кузьым басьто; нош кин ке косэмъя лэсьтйсько ке, соку мон оскем ужез быдэсьясъ гинэ луйсько. <sup>18</sup>Кыче мыным мед-кузьым? – Мынам медэ-кузьыме – нокинлэсь уждун басьтытэк, кузьым октытэк Евангелиез, Христос сярысь Зеч Иворез тодытон.

<sup>19</sup>Мон эрико адями, нокинэн, номырин герзасъкемын өвӧл ке но, троссэ Инмар пала берыктон понна, асме ваньмызлы тэрытскись ляльчи кари.

<sup>20</sup>Иудейёсты оскон пала карон понна, иудейёс азын мон иудей луи. Закон улын улйсьёсты оскон пала карон понна, закон улын улйсьёс азын мон закон улын улйсь кадь луи. <sup>21</sup>Законэз тодйсьтэмъёсты оскон пала карон понна, законэз тодйсьтэмъёс кадь кариськи, – нош ачим Инмар азын мон законэз тодйсьтэм кадь ой улы, Христослэн законэзлы тэрытскыса улй. <sup>22</sup>Лябъёсты оскон пала карон понна, лябъёс азын лябъзем

мурт кадь уль. Кӧнязэ ке но утён понна, мон ваньмыз азын ваньмыз кадь ик кариськылы. <sup>23</sup>Нош тае мон Зеч Иворез вӧлмытон понна лэсьтисько, солэсь дэлетсэ басьтисьёс пӧлы пырон понна.

<sup>24</sup>Уд тодйське шат, чӧшатскыку ваньмыз бызе, нош одйгез гинэ мед-кузьым басьтэ шуыса? Бызе ук, тй но мед-кузьым мед басьтоды. <sup>25</sup>Ваньзы сюлмысь тыршисьёс котьмарлэсь но утиськыса возисько: чӧшаткисьёс сисьмоно-быроно венец басьтон понна, нош асьмеос – сисьмисьтэмзэ-бырисьтэмзэ венецез басьтон понна. <sup>26</sup>Соин ик, мон бызисько ке, пумозяз вуон понна бызисько. Нюръяськисько ке, омырез сэзьян понна гинэ кыным уг сэзьяськы. <sup>27</sup>Мон, мукетъёслы Зеч Иворез тодытйсь, медтэк-кузьымтэк медам кылы вал шуыса, ас мугорме курадзытыса зйбломьтйсько, тэрыткись-кылзйськись карисько.

### 10-тй ЛЮКЕТ

<sup>1</sup>Агай-выньёсы, мынам потэ тй мед тодысалды, кызы асьмелэн вашкала атайёсмы пилем шобрет улын мынйзы но зарезь вамен выжизы. <sup>2</sup>Ваньзы соос пилем улын, зарезьын Моисейлэн пылатонэныз пылатйськызы. <sup>3</sup>Ваньзы соос одйг духовной сиён сиизы. <sup>4</sup>Ваньзы соос одйг духовной юонэз юизы, уго съӧразы мынйсь духовной изгурезьысь юизы; нош со изгурезь – Ачиз Христос вал. <sup>5</sup>Тросэз Инмарлы ярантэм луизы; соос кыр дуннее кулыса кылизы. <sup>6</sup>Ваньмыз таос асьмеды

алон понна вал: кызы вашкала атайёсмы лул-мугорлэн лекесь куронъёсызлы сётскыса улйзы, асьмеос но лулмугорлэн лекесь куронъёсызлы сётскыса медам улэ вал шуыса. <sup>7</sup>Соос пöлысь куд-огъёсыз кадь, тй но сульдэръёслы йыбыртъясьёс эн луэ. Соос сярись гожтэмын: "Калык сиыны, юыны пуксиз но сульдэръёсыз азе эктыны султйз". <sup>8</sup>Азон-калгон съöлык лэсьтыса ум улэ, кызы вашкала атайёсмы пöлысь куд-огез азыса-калгыса улйзы но одйгаз нуналэ соос пöлысь кызы куинь сюрсэз кулйз. <sup>9</sup>Христослэсь визьзэ ум сыналэ, кызы вашкала атайёсмы пöлысь куд-огъёсыз визь сыназы, но кыйёс соосты быдтйзы. <sup>10</sup>Зургетыса эн улэ, кызы соос пöлысь куд-огъёсыз зургетыса улйзы, но кылчин-убир\* соосты виылйз. <sup>11</sup>Ваньмыз таос соослы со понна луиз: асьмеос соослэсь адзем медам каре, нош та асьмелы, берпуметй аръёсы улыны кылемъёслы, алон понна гожтэмын. <sup>12</sup>Соин ик, кин ке но мон йыг-йыг сылйсько шуыса малпа ке, чакласькы: медад усы. <sup>13</sup>Адямислы чидантэм визь сынаськонъёс тй доры öз на вуылэ. Оскиськымон Инмар. Со тйледлы чиданы луонтэм визь сынаськон уз лэзы. Чиданысылыны мед быгатозы шуыса, Со тйледлы визь сынаськонэн ёош утиськон но сётос.

<sup>14</sup>Гажаноосы, сульдэръёслы йыбыртъянъёслэсь утиське. <sup>15</sup>Тйледлы, валась муртъёслы мон верасько. Верамме валаны тырше. <sup>16</sup>Дэлет басьтон бакель карем чаша асьмеды Христослэн Вирыныз

\* 10:10 Черк-славян кылын: *всегубитель*.

огазе уг кары шат? Нянь, кудзэ тйялтйськомы, асьмеды Христослэн Мугорыныз огазе уг кары шат? <sup>17</sup>Нянь одйг, нош асьмеос трос мурт ке но, ваньмы огазын одйг мугор луиськомы, малы ке шуоно, ваньнамы одйг нянь бордысен чылкытатесиськомы. <sup>18</sup>Израиль калык шоры учке: курбон сийсьёс курбон тыронлэн адямиосыз пöлы пыриськисьёс уг луо-а? <sup>19</sup>Мар бен мон вераны турттйсько? Сульдэр, оло, мар ке ванез возматэ-а? Сульдэрлы курбон сётон но, оло, мар ке ванез возматэ ик-а? <sup>20</sup>Уг. Язычникъёс курбонзэс Инмарлы уг сёто, периослы сёто, нош мынам тйледыз периосын кусып возыса улытэме уг поты. <sup>21</sup>Уд быгатйське огдыре Кузё-Инмарлэн чашаысьтыз, со дыре ик перилэн чашаысьтыз но юыны: уд быгатйське ог дыре ик Кузё-Инмарлэн но сиськоназ, периослэн но сиськоназы пыриськыны. <sup>22</sup>Кузё-Инмарлэсь вожзэ поттыны дйсьтомы шат? Асьмеос Солэсь кужмогес шат?

<sup>23</sup>Котьмар карыны мыным лэземын, но ваньмыз пайда уг вайы; котьмар карыны мыным лэземын, но ваньмыз пайда уг сёты. <sup>24</sup>Нокин но аслыз пайда медаз утча, мукетызлы мед утчалоз. <sup>25</sup>Базарын мар вузаське, со сярысь юатэк-вератэк, шугьяськытэк, мар вань сие. <sup>26</sup>Музьем но, мар отын вань, – ваньмыз Кузё-Инмарлэн уго. <sup>27</sup>Христослы оскисьтэм мурт тйледыз куное öтиз но тй мыноно кариськиды ке, – соку мар ёектйзы юатэк-вератэк, шугьяськытэк сие. <sup>28</sup>Нош кин ке тйледлы шуиз ке: ”Та – сульдэръёслы курбон сётэм сиён”, соку тйледлы ивортйсь адыми понна, солы сюлэм-



шугьяськоно медаз луы шуыса, эн сие; уго музьем но маин со тырмемын – со Кузё-Инмарлэн. <sup>29</sup>Аслам сюлэмшугьяськонэ сярысь уг вераськы, мукетлэн сярысь верасько. Мынам мылкыд каронэ мукет муртэ малы сюлэмшугьяськытыны кулэ? <sup>30</sup>Мон Инмарлы тау карыса сиисько ке, малы монэ тау карем сиён понна пыкылонэз-курланэз? <sup>31</sup>Озъен, сииськоды-а, юиськоды-а, яке мукет маке лэсьтйськоды-а – ваньзэ Инмарез выль-дано карон понна лэсьтэ. <sup>32</sup>Иудейёсты но, еллинъёсты но, Инмарлэсь черксэ но визь сынаськонэ пыртыса эн улэ. <sup>33</sup>Кызы мон но аслым пайда утчатэк ваньмызлы, котьмар ласянь тэрытскыса улйсько, мон тыршисько соослы пайда мед луоз, тросэз мед утиськозы шуыса.

### 11-тй ЛЮКЕТ

<sup>1</sup>Мынэсьтым адзем каре, кызы мон Христослэсь адзем карисько. <sup>2</sup>Агай-выньёсы, мон тйледыз ушьясько, монэ тодады возем понна, дыше-тонъёсты-верамъёсты утемды понна. <sup>3</sup>Тйледлы озы ик тодытэме потэ: котькудйзлы пиосмуртлы йыр – Христос, кышномуртлы йыр – кузпалыз, нош Христослы йыр – Инмар. <sup>4</sup>Котькыче пиосмурт йырзэ шобыртыса вöсяське яке Инмарлэсь кылзэ ивортэ ке, Йырез сантэма. <sup>5</sup>Котькудйз кышномурт йырзэ шобыртытэк вöсяське яке Инмарлэсь кылзэ ивортэ ке, аслэсьтыз йырзэ сантэма. Тазы уго со йырзэ мычем кышномуртлы укша.

<sup>6</sup>Кышномуртлэн йырзэ шобыртэмез уг ке поты, соку мед чышкиськоз; нош кышномуртлы чышкиськыса, мычиськыса ветлыны возыт ке потэ, соку йырзэ мед шобыртоз. <sup>7</sup>Озыен, пиосмурт йырзэ шобыртыны кулэ өвөл, малы ке шуоно, со – Инмарлэн тусбуез, Солэн данэз; нош кышномурт – кузпалызлэн данэз. <sup>8</sup>Уго пиосмурт кышномурт бордысь өз поты, кышномурт пиосмурт бордысь потйз. <sup>9</sup>Пиосмурт кышномурт понна кылдытэмын өвөл, нош кышномурт пиосмурт понна кылдытэмын. <sup>10</sup>Кылчинъёс азын, кышномуртлэн йыр вылысьтыз шобретэз – кузпаллы тэрытскыса улонлэн тодметэз луэ. <sup>11</sup>Кузё-Инмар азын пиосмурт но кышномурт, кышномурт но пиосмурт ог-огзылы тэрытскытэк улыны уг быгато. <sup>12</sup>Кызы ке кышномурт пиосмурт бордысь потэмын, озыи пиосмурт кышномурт пыр вордйськемын; нош ваньмыз – Инмар бордысь потэмын. <sup>13</sup>Асьтэос малпалэ ай, зеч-а кышномуртлы Инмар азын йырзэ шобыртытэк вöсяськыны? <sup>14</sup>Инмарен кылдытэм улон азь тйледыз уг дышеты-а – пиосмурт йырсизэ кузь будэтэ ке, со сое сантэма шуыса, <sup>15</sup>нош кышномурт йырсизэ кузь будэтэ ке, со солы сй-дан вае, йырси солы шобырскон понна сётэмын. <sup>16</sup>Нош кинлэн ке та пумысен ченгешемез потысал ке, милям сыче сяммы өвөл, Инмар черкъёслэн но өвөл сыче сямзы.

<sup>17</sup>Эшшо тае вераме потэ: тйледыз ушъяме уг поты, малы ке шуоно, тйляд люкаськонъёсты пайда уг ваё, уродзэ гинэ ваё. <sup>18</sup>Нырысь ик, мон кылй тйляд черкады люкиськылонъёс-керетонъёс луыло



шуо. Пичи ке но солы оскытэк уг луы. <sup>19</sup>Тй пöлын люкиськонъёс но луыны кулэ, уго соку тодмо луоз кин шонер, кин шонертэм. <sup>20</sup>Эшшо, тй огазе люкаськиськоды ке но, – Кузё-Инмарлэсь жытанзэ ортчйтйськоды шуыны уг луы. <sup>21</sup>Уго котькудйз аслэсьтыз сьöраз ваем сиёнзэ дыртыса сие, соин ик одйгез сютэм кыле, нош мукетыз кудзыса кошке. <sup>22</sup>Сиён понна, юон понна тйляд дорды öвöл-а? Яке Инмар черкез сантэмамды, куанерьёсты ултйямды потэ-а? Мар тйледлы верано? Та понна, оло, ушьяно тйледыз? Уг, та понна тйледыз уг ушья.

<sup>23</sup>Мон уго та дышетонэз Аслэсьтыз Кузё-Инмарлэсь кабыл басьтй но тйледлы тодытй: Кузё-Инмар Иисус Христос со уе, кудаз вузаса сётэмын вал, нянь кутйз, <sup>24</sup>тау карыса тйялтйз но шуиз: ”Басьтэлэ, сиелэ, та тй понна тйялтэм Мынам Мугоры, Монэ буре вайыса тазы каре”. <sup>25</sup>Жытан бере озыы ик чашаез кутйз, но шуиз: ”Та чаша луэ выль сйзён Мынам Вирам; тае юыкуды, котьку но Монэ буре вае”. <sup>26</sup>Уго котьку но та нянез сиыкуды, та чашаысь юыкуды, Кузё-Инмарлэсь кулонзэ тодытйськоды. Со лыктытозь озыы луоз.

<sup>27</sup>Со понна ик, кин но кычө кариськытэк та нянез сиёз, Кузё-Инмарлэсь чашазэ юоз, со Кузё-Инмарлэн Мугорызлы но Виризылы пумит сьöлыка.

<sup>28</sup>Нырысь ик, адями ассэ ачиз мед чаклалоз-эскероз ук, собере та нянь бордысь мед сиёз, та чашаысь мед юоз. <sup>29</sup>Уго котькудйз, кин Кузё-Инмарлэн Мугорыз сярысь малпаськытэк, ярамон луытэк сие, юэ, со ассэ янгыше уськытон понна



сие, юэ. <sup>30</sup>Со понна ик тй пöлысь тросэз лябземын, висисесь, тросэз куло но. <sup>31</sup>Асьмеос асьмеды судить карысалмы ке, судить каронлэсь мозмыткысалмы. <sup>32</sup>Нош кукке Кузё-Инмар асьмеды судить каре, озыы Со асьмеды тупатэ-визьма, быдэс дуннеен ёош суд улэ медам сюре шуыса. <sup>33</sup>Соин ик, агай-вынъёсы, жытанэ люкаськыкуды, огдэс-огды вите. <sup>34</sup>Нош кинлэн кöтыз сюма, гуртаз мед сиськоз, люкаськонды Инмарлэн судить карон улаз сюронлы медаз лу. Мукетъёссэ лыктэм берам лэсьто-интыяло.

## 12-тй ЛЮКЕТ

<sup>1</sup>Агай-вынъёсы, духовной кузьымъёс сярысь но тйледыз тодытытэк кельтэме уг поты. <sup>2</sup>Годйськоды на, кукке тй язычникъёс вал на, тйледыз кинке кыскыса нуэм кадь, кылтэм-ымтэм сульдэръёс-идольёс доры тй ветлйськоды вал. <sup>3</sup>Соин ик тйледлы ялйсько: Инмарлэн Духеныз вераськись нокин но Иисус вылэ карган-юриськон кыл уз вера, Святой Духтэк нокинлэн но Иисусэз Кузё-Инмар шуэмез уз луы.

<sup>4</sup>Кузьымъёс пöртэмесь, нош Дух – одйг. <sup>5</sup>Ужантыршонъёс пöртэмесь, нош Кузё-Инмар – одйг. <sup>6</sup>Вань пöртэм лэсьтйськонъёс-каронъёс, нош Инмар – одйг, адямиос пушкын Со ваньзэ лэсьтэ. <sup>7</sup>Нош котькудйзлы Духлэн возматйськемез ваньмызлы пайда ваён понна луэ. <sup>8</sup>Дух одйгезлы визьлыко кыл сётэ, мукетызлы, со Дух ик, то-

донлэсь кылзэ сётэ. <sup>9</sup>Со Дух ик, куд-огезлы оскон сётэ; со Дух ик, куд-огезлы бурмытыны быгатонлык сётэ. <sup>10</sup>Куд-огезлы сётэ паймымон ужьёс лэсьтон; куд-огезлы – Инмарлэсь кылзэ ивортон, куд-огезлы – духъёсты тодман, куд-огезлы – пöртэм кыльёсын вераськон, куд-огезлы – кыльёсты валэктон. <sup>11</sup>Нош ваньзэ тае одйг со Дух ик поттэ, кызы Аслыз кулэ, котькудйзлы нимысьтыз сётылэ.

<sup>12</sup>Уго, кызы мугор одйг, нош люкетъёсыз трос, нош вань та люкетъёс одйг мугорлэн люкетъёсыз луо, соос трос ке но, одйг мугор кылдыто, – озыы ик Христос но. <sup>13</sup>Уго ваньмы асьмеос одйг Духен одйг мугор луон понна пылатйськимы: иудейёс но, еллинъёс но, ляльчиос но, эрикын улйсьёс но, – ваньмы асьмеос одйг Духен сектамын. <sup>14</sup>Мугор одйг люкетлэсь öвöл, трос люкетъёслэсь сылэ. <sup>15</sup>Пыд шуиз ке: ”Мон мугорлэн люкетэз öвöл, малы ке шуоно, мон ки öвöл”. Соин сэрен со мугорлэн люкетэз уг луы шат? <sup>16</sup>Нош пель шуиз ке: ”Мон мугорлэн люкетэз уг луиськы, малы ке шуоно, мон син öвöл”. Соин сэрен со мугорлэн люкетэз уг луы шат? <sup>17</sup>Быдэс мугор син гинэ луысал ке, соку кылон кытын? Быдэс мугор кылон гинэ луысал ке, соку шöмез шöдон кытын? <sup>18</sup>Но Инмар котькудзэ мугор люкетэз ас интыяз пуктйз, кызы Солы кулэ вал. <sup>19</sup>Нош ваньмыз одйг кыче ке гинэ люкетлэсь сылысал ке, соку кытын мугор? <sup>20</sup>Люкетъёс трос, но соос одйг мугор кылдыто. <sup>21</sup>Син килы уг быгаты шуыны: ”Тон мыным кулэ öвöл”; яке, йыр пыдъёслы: ”Тй мыным кулэ öвöл”.

<sup>22</sup>Мугорлэн уката ик туж лябесь-кынартэмесь адзиськись люкетъёсыз, тужгес но кулэсь луо. <sup>23</sup>Куд-ог люкетъёс мугорын йоноесь-чебересь уггес ке но адзисько, соосты юнгес сйё-сано кариськомы. <sup>24</sup>Асьмелэсь чебер-йоно адскисьтэм люкетъёсмес, уката ик возьдаськоно мугор люкетъёсмес, шобыртйськомы. Нош чебер-йоно адкись люкетъёсмы нимысьтыз сйё-сано каремез, шобыртэмез кулэ уг каро. Инмар мугорез озыы кылдытйз: тужгес сйтэм-сантэм адкись люкетлы тужгес бадзым данлык сётйз, <sup>25</sup>мугорын люкиськылонъёс медаз луэ, вань люкетъёс ог-огзы сярысь огкадь мед сюлмаськозы. <sup>26</sup>Соин ик, курадзе ке одйгез люкет, соин валче вань люкетъёс курадзо; данэ поттйське ке одйгез люкет, соин валче вань люкетъёс шумпото.

<sup>27</sup>Тй – Христослэн мугорыз, нош нимады – Солэн люкетъёсыз. <sup>28</sup>Куд-огъёссэ Инмар черке нырысь ик, апостол карыса пуктйз, куд-огзэ пророк карыса, куд-огзэ дышетйсь карыса пуктйз; собере куд-огезлы паймымон ужъёс лэсьтыны кужым сётйз; куд-огезлы бурмытылыны быгатонлык, юрттэт сётонъёс, кивалтон ужъёс, пөртэм кыльёсын вераськыны быгатонлык сётйз. <sup>29</sup>Ваньмыз-а апостольёс? Ваньмыз-а пророкъёс? Ваньмыз-а дышетйсьёс? Ваньмыз-а паймымон уж лэсьтйсьёс? <sup>30</sup>Ваньмызлэн бурмытылыны быгатонлыкез вань-а? Ваньмыз мурт кыльёсын верасько-а? Ваньмыз валэктйсьёс-а? <sup>31</sup>Эшшо но бадзымгес быгатонлыкъёс басьтон понна тырше.

Мон тйледлы самой усто сюрес возьмато.

## 13-тй ЛЮКЕТ

<sup>1</sup>Шуом, мон аядми кыльёсын, кылчин кыльёсын, пе, быгатйсько вераськыны, нош яратонэ овёл ке, соку мон шальтыртйсь пу гырлы, дыбыртйсь коскам крезь луисько. <sup>2</sup>Инмарлэсь кылзэ ивортныны быгатонлыке, пе, вань, вань ватйськыса улйсь зэмлыкьёсты тодйсько, котьмае но тодонэ, мур осконэ вань, гурезьёсты но интыысьтызы воштыны, пе, быгатйсько, нош яратонэ овёл ке, – соку мон ваньлэсь овёлтэм маке гинэ луисько.

<sup>3</sup>Аслэсьтым вань байлыкме-узырлыкме, пе, люкылй, оскон понна аслэсьтым мугорме но сутыны сётй, нош яратонэ овёл ке – татысь мон нокрыче но пайда уг басьты.

<sup>4</sup>Яратон кема чида, гажа-жаля; яратон уг вожьяськы; яратон ассэ вылье уг пукты, уг вылтйяськы, <sup>5</sup>яратон уг кереты, уг даллашы; аслыз пайда уг утча; уг керзегьяськы, уродэз-лекез сюлмаз уг возы. <sup>6</sup>Со өрекчаськонлы шум уг поты, нош зэмлыклы шумпотэ; <sup>7</sup>яратон ваньмызлы дурбасьтэ, юн оске, чылкыт сюлмын оскиське, ваньзэ чида.

<sup>8</sup>Инмарлэсь кылзэ ивортоньёс ке но быризы, кыльёс ке но дугдйзы, тодон-валан но ышысал ке, – яратон ноку но уз быры. <sup>9</sup>Уго милям тодоньёсмы тырмыт овёл, Инмарлэсь кылзэ ивортныны быгатонлыкмы но пичи гинэ. <sup>10</sup>Нош куке дуншектэм улон вуиз ке, соку вань шеко, тырттэм луисез ышоз-быроз. <sup>11</sup>Куке мон пичи вал, пичи мурт кадь вераськисько вал, пичи мурт кадь малпаськисько вал, пичи мурт кадь верасько-

малпасько вал; нош куке воргорон луи, соку мар вал пичи муртлэн кадез, солэсь куштйськы. <sup>12</sup>Та дуннеын ваньзэ пеймыт пияла пыртй, уй вöтын кадь адзиськомы, нош вуоно улонын ваче ымныр адзиськомы. Али мынам тодон-валанэ пичи гинэ, нош вуонояз улонын со пачыл луоз, озьы, кызы мон сярысь Кузё-Инмар тодэ. <sup>13</sup>Нош али уло та куиньёс: оскон, оскиськон, яратон; но яратон соос пöлысь ваньмызлэсь выльйынгесэз.

#### 14-тй ЛЮКЕТ

<sup>1</sup>Тужгес тырше яратыса улыны; мукет духовной кузьымъёсты но басьтыны сюлмаське, уката ик, Инмарлэсь кылзэ ивортонэз. <sup>2</sup>Уго кин ке тодмотэм кылын вера ке, со адямиослы уг, Инмарлы вера, малы ке шуоно, сое нокин но уг вала, ватйськыса улйсь зэмлыкъёсты со Духлэн кужыменыз-дэлетэныз вера. <sup>3</sup>Нош кинлэн ке Инмарлэсь кылзэ ивортыны Инмарлэн сётэм дэлетэз вань, со адямиослы валэктон, оскытон, буйгатон понна вера. <sup>4</sup>Кин ке тодмотэм кылын вера ке, со ассэ ачиз валэктэ; нош кин ке Инмарлэсь кылзэ ивортэ ке, со черклы валэктэ. <sup>5</sup>Мылкыд карисько, ваньды тй кыльёсын мед вераськоды; но умойгес луоз Инмарлэсь кылзэ ивортйды ке, уго Инмарлэсь кылзэ ивортйсь кыльёсын верасьлэсь выльйынгес. Мукет ужпум, куке со, черк мед валалоз шуыса, ачиз ик валэктэ ке.



<sup>6</sup>Табере, агай-выньёсы, мон тй доры лыкто но тодмотэм кыльёсын вераськыны кутски ке, соку тйледлы кыче мон пайда ваё, мынам тйледын вераськонам өз ке луы усътыса веранэз, яке валэктонэз, яке Инмарлэсь кылзэ ивортонэз, яке дышетонэз? <sup>7</sup>Лултэм, куара поттйсь арбериос – чипчирган яке крезь висьяськись куара уг ке сёто, кызы тодмалод, чипчирганэн-а яке крезен-а мае ке шудо шуыса? <sup>8</sup>Труба шудйсь но валантэм куара поттйз ке, кин ожмаськонэ дасьяськыны кутскоз? <sup>9</sup>Озы ик тй но валантэм кыльёс верады ке, кин валалоз, мар тй вераськоды? Тй төллы вералоды. <sup>10</sup>Кылсярысь, дунне вылын көня пөртэм пумо кыльёс, нош соос пöлын одйгез но номыр возматйсьтэмез öвöл. <sup>11</sup>Нош мон кыльёслэсь пуштроссэс уг ке валаськы, соку мон вераськись мурт понна мурт куньсь адями луисько, вераськись мурт но мон понна мурт кунлэн адямиез луэ. <sup>12</sup>Озы ик тй но духовной кузьымьёсты басьтыны сюлмаське, черкез валэктон-дышетон понна, тыршелэ со кузьымьёсын узырмыны. <sup>13</sup>Мурт кылын вераськись! Валэктыны быгатонлык басьтон понна вöсяськы. <sup>14</sup>Уго, кукке мон тодмотэм кылын вöсяськисько, соку мынам духе вöсяське ке но, нош визьмы-валанэ емьштэк кыле. <sup>15</sup>Мар-о бен? Кутско духеным вöсяськыны, кутско визьмыным но вöсяськыны; духеным кырзало, визьмыным но кырзало. <sup>16</sup>Уго тон духен тау карид ке, нош верамдэ валасьтэм мурт, тыныд тау карон дыръяд, кызы шуоз ”аминь”? Со уг вала уго, мар тон вераськод. <sup>17</sup>Тон сюлмысьтыд тау кариськод, нош со му-

кетызлы нокыче пайда уг вайы. <sup>18</sup>Инмарлы тау карисько: мон тй пöлын ваньмызлэсь трос кыльёсын вераськыны быгатйсько. <sup>19</sup>Нош черкын, мукетьёссэ но валэктон понна, эсьмаса, вить кыл вераме потэ аслам визьмыным, тодмотэм-валантэм кылын сюрс кыльёс вератозь.

<sup>20</sup>Агай-выньёс! Визьдяя пичи мурт кадь эн луэ: уродлы-леклы пумит валасьтэм нуны кадесь луэ, нош визьдяя быдэ вуэмьёс кадесь луэ. <sup>21</sup>Законын гожтэмын: "Мукет кыльёсын, мукет ымьёсын та калыклы верало, соос соку но Монэ уз кылзйське, – шуэ Кузё-Инмар". <sup>22</sup>Озбы, кыльёс паймымон тодмет луо оскымтэос понна, оскисьёс понна öвöл, нош Инмарлэсь кылзэ ивортон оскисьёс понна паймымон тодмет луэ, оскымтэос понна öвöл. <sup>23</sup>Быдэс черк огазе люкаськиз но ваньзы тодмотэм кыльёсын вераськыны кутскизы ке, соку тй доры палэнысь лыктэм адямиос яке оскисьтэм адямиос пыризы ке, уз шуэ-а: "Мар-о тй визьтэмьяськиськоды?" <sup>24</sup>Нош ваньзы Инмарлэсь кылзэ ивортон дыръя, оскисьтэм яке палэнысь лыктэм адями пыриз ке, соку соос та адямилэсь лушкем сьöлыкьёссэ шарае потто но судить каро. <sup>25</sup>Но солэн сюлмызлэсь ватйськыса улйсь лушкемлыкьёсыз ваньмызлы тодмо луозы. Соку со кымин уськытскоз но Инмарлы йыбырттыса шуоз: "Зэмзэ ик, Инмар тй пöлын".

<sup>26</sup>Озбыен, агай-выньёсы, мар-о бен? Куке тй огазе люкаськиськоды, котькуддылэн тйляд псаломды вань, дышетонды вань, кылды вань, усьтйськонды вань, валэктонды вань, – ваньмыз та тй-

ледыз юнматонлы мед луоз. <sup>27</sup>Кин ке тодмотэм кылын вераське ке, кык ёошен вераське, тужгес троссэ – куинь ёошен, но ваньзы огзы бере огзы черодэн, нош одйгез тй пёлысь мед валэктылоз. <sup>28</sup>Нош валэктйсь мурт өз ке луы, соку черкын шыпыт ул, ас поннад вёсяськы, Инмарлы. <sup>29</sup>Пророкёс но кыкез яке куинез огзы бере огзы, черодэн мед вераськозы, нош мукетёсыз верам кылзэс мед эскерозы-чаклалозы. <sup>30</sup>Пукисьёс пёлысь одйгезлы усътйськон луиз ке, нырысетйез шыпыт мед кариськоз. <sup>31</sup>Ваньды мед дышетскоды но ваньды буйгатскон мед басьтозы шуыса, огды бёрсы огды ваньнады Инмарлэсь кылзэ ивортыны быгатйськоды. <sup>32</sup>Пророкёслэн духёссы пророкёслэсь кылзйськись луыны кулэ. <sup>33</sup>Малы ке шуоно, Инмар куям-палям улонлэн өвёл, Со тупаса улонлэн Инмарез. Тазы луыны кулэ вёсяськисьёслэн вань черкёсазы. <sup>34</sup>Кышноосты черкын шыпыт мед улозы: соослы уго вераськыны лэземын өвёл. Инмар законья но, соос тэрытскыса улыны кулэ. <sup>35</sup>Соослэн малы ке дышетскемзы потэ ке, со сярись гуртысенызы кузпальёссылэсь мед юалозы. Кышномуртлы черкын вераськыны чебер өвёл. <sup>36</sup>Оло тй бордысь потйз шат Инмар кыл? Яке одйг тй доры гинэ со вуиз-а? <sup>37</sup>Кин ке ассэ пророк яке духовной адями шуыса лыдья ке, со мед тодоз: мон тйледлы Инмарлэсь курон-косонёссэ гожтйсько; <sup>38</sup>нош кинлэн валамез уг ке поты, медаз вала. <sup>39</sup>Озы, агай-выньёсы, Инмарлэсь кылзэ ивортон сярись сьулмаське; пёртэм кыльёсын вераськыны но эн локетэ. <sup>40</sup>Но ваньмыз мед луоз озы, кызы кулэ, радызья.

## 15-тй ЛЮКЕТ

<sup>1</sup>Тйледлы, агай-выньёсы, Зеч Иворез тодады вайыто, кудзэ мон тйледлы тодытылй, кудзэ тй кабыл басьтйды, кудйз бордын тй возиськиськоды. <sup>2</sup>Со пыр тй утиськоды мынам дышетыса вераме бордын возиськиды ке, нош өд ке, соку осконды юнме гинэ луоз. <sup>3</sup>Нырысь кутскыса ик уго мон тйледлы тодытй сое, мае ачим кабыл басьтй: Христос асьмелэн сьöлыкьёсмы понна кулйз, кызы верамын вал Священной Гожтэмын, <sup>4</sup>Со ватэмын вал но куинетй нуналаз улзыса султйз, кызы верамын вал Священной Гожтэмын. <sup>5</sup>Кифалы возьматскиз, собере – дас кыкназылы; <sup>6</sup>собере вить сюлэсь трос агай-выньёслы ваньзылы ёош возьматскиз. Соос пöлысь тросэз туннэ нуналозь улэпесь на, нош куд-огез кулйзы но ини. <sup>7</sup>Собере возьматскиз Иаковлы, озьы ик вань апостольёслы. <sup>8</sup>Нош ваньмыз бере возьматскиз мыным – пöрмостэм, дырыз вуытэк вордйськем нунылы. <sup>9</sup>Мон уго апостольёс пöлысь ваньмызлэсь пичиез, апостол шуыса лыдьяны но сйлйсьтэм, малы ке шуоно, Инмарлэсь Черксэ улляса ветлй. <sup>10</sup>Нош Инмарлэн сётэм дэлетэныз-зечлыкеныз мон луи сыче, кыче али вань. Солэн мон борды сётэм дэлетэз юнме өз луы. Мон ваньзылэсь соослэсь тросгес ужай; шонерзэ вераса, мон өвöl, мон бордын улйсь Инмарлэн дэлетэз ужаз. <sup>11</sup>Мон-а, соос-а тодыто, – ми ваньмы Зеч Иворез тодытйськомы, тй солы оскиськоды.

<sup>12</sup>Христос сярись, Со кулэмысь улзыса султйз шуыса, ми тодытйськомы ке, нош тй пöлысь куд-

огез кызы быгато кулэмысь улзыса султон өвөл шуыса вераны? <sup>13</sup>Кулэмысь улзыса султон өвөл ке, соку Христос но улзыса өз султы; <sup>14</sup>нош Христос улзыса өз ке султы, соку милям тодытонмы но юнме, юнме тйляд осконды но. <sup>15</sup>Соку ми Инмарлы пумит мынйсь өрекчи тодытйсьёс луысалмы, малы ке шуоно, Инмар сярыйсь Со Христосэз улзытыса султытйз шуыса тодытйськомы. Зэмзэ но кулэмьёс шайгуысь улзыса уг султо ке, соку Инмар Иисусэз но улзытыса өз султыты? <sup>16</sup>Кулэмьёс улзыса уг ке султо, соку Христос но улзыса өз султы? <sup>17</sup>Нош Христос улзыса өз ке султы, тйляд осконды юнме: тйляд сьöлыкьёсты тй бордын ик уло на? <sup>18</sup>Озы ке, Христослы оскыса кулэмьёс но соку кулйзы-быризы. <sup>19</sup>Таяз дуннеын улон понна гинэ Христослы оскиськом ке, соку асьмеос вань адымиослэсь но шудтэм адымиос.

<sup>20</sup>Зэм ик, Христос кулэмысь улзыса султйз, кулэмьёс пöлысь Со нырысетйез, Кин улзыса султйз. <sup>21</sup>Уго кызы кулон адыми пыр лыктйз, озы ик кулэмьёслэн улзыса султонзы но адыми пыр лыктйз. <sup>22</sup>Адам пыр ваньмыз кулылйзы, нош Христос пыр ваньмыз улзыса султозы. <sup>23</sup>Нырысь ик Христос улзыса султйз, собере, Христос лыктэм бере, Солэн адымиосыз но улзыса султозы. <sup>24</sup>Нош собере вуоз пум. Куке уродлэсь котькыче кузёяськонзэ-кивалтонзэ, котькыче властьсэ но кужымзэ быдтоз, соку Христос Эксэйлыкез Инмарлы, Атайлы сөтоз. <sup>25</sup>Вань тушмоньёссэ Аслаз пыд выжыяз уськытытояз, Сола эксэйын пукыны кулэуго. <sup>26</sup>Вань тушмоньёс пöлысь самой пумаз быд-



тэмын луоз кулон. <sup>27</sup>Уго Инмар ваньзэ Христослы тэрытскись кариз. ”Ваньмыз” пöлы Инмар уг пыры, малы ке шуоно, Со Ачиз ваньзэ Христослы тэрытскись кариз. <sup>28</sup>Нош куке ваньзэ Христослы тэрытскись кариз ке, соку Пи но тэрытскоз Аслыз ваньзэ тэрытскись карись Атайлы – Инмар ваньмызлы Кузё мед луоз, ваньмыз бордын мед улоз.

<sup>29</sup>Соку ма карозы кулэмьёс понна пылатйськисьёс? Кулэмьёс чик улзыса уг султо ке, соку малы кулэмьёс понна пылатйськонэз? <sup>30</sup>Мар понна часлы быдэ курадзоньёсын пумиськоно луиськомы? <sup>31</sup>Нуналлы быдэ мон кулон азын сылйсько. Зэмзэ но, агай-выньёсы, тйляд азинсконьёсынды мон ушьяськисько, со Кузё-Инмармы Иисус Христос бордысь потэ. <sup>32</sup>Огшоры адямилэн мылкыд каронэзья гинэ мон Ефесын лек пöйшурьёсын нюрьяськи ке, соку мыным кыче пайдаез? Кулэмьёс улзыса уг султо ке, ”кутскоме сиыны, юыны, – чюказе асьмелэн но кулонмы вуэ ук!” <sup>33</sup>Öрекчаськон ки улэ эн сётске: ”Урод эшъёс зеч сямьёсты сапталос-сöро”. <sup>34</sup>Сазьтйське, дугдэ сьöлыкамысь. Тйледлы возыт мед луоз шуыса тае верасько: тй пöлысь куд-огез Инмарез та дырозь уг тодо.

<sup>35</sup>Кин ке но, оло, юалоз: ”Кызы кулэмьёс улзыса султыны быгатозы? Кыче мугорын соос лыктозы?” <sup>36</sup>Валасьтэм! Кидыс, кудзэ тон кизйськод, со öз ке кулы, уз улзы ук! <sup>37</sup>Кизиськод ке, куроез шепеныз уд кизиськы ук, юэз огназзэ кизиськод, мар сюрöz: чабей-а, яке кыче ке мукетыз-а кидыс. <sup>38</sup>Нош Инмар солы мугор сөтйиз, кызы мылыз

потйз, котькудйзлэн кидыслэн аслаз мугорыз.  
<sup>39</sup>Одйгез лулмугор мукетызлы уг укша: адямиос-  
 лэн одйг лулзы-мугорзы, пудоослэн – мукет, чо-  
 рыгьёслэн – мукет, тылобурдоослэн – нош мукет.  
<sup>40</sup>Вань ин мугорьёс, вань музьем мугорьёс: ин-  
 мысьёслэн одйг данзы-чеберзы, нош музьемьсь-  
 ёслэн – мукет. <sup>41</sup>Шундылэн одйг данэз-чеберез,  
 толэзьлэн – мукет данэз-чеберез, кизилиослэн –  
 нош мукет; кизили но кизилилэсь данэныз-чебе-  
 реныз пöртэм луэ.

<sup>42</sup>Озы ик кулэмьёслэн но улъыса султонзы: сись-  
 монлы кизиське, сисьмонтэмлы султэ; <sup>43</sup>дантэм  
 луыса кизиське, данэн султэ; лябземен кизиське,  
 кужымен султэ. <sup>44</sup>Кизиське луло мугор, султэ ду-  
 ховой мугор. Вань луло мугор, вань на духовной  
 мугор. <sup>45</sup>Тазы ик гожтэмын: ”Нырысетй адями  
 Адам улэп луло луиз”, нош берпуметйез Адам  
 улэп карись Дух луэ. <sup>46</sup>Духлэсез азьвыл öвöл, лул-  
 лэсез азьвыл; собере ини духлэсез. <sup>47</sup>Нырысетй  
 адями – музьемьсь, суйлэсь; кыкетй Адями –  
 Кузё-Инмар, Инмысь. <sup>48</sup>Кыче суйлэсез адями,  
 сьчөөсь ик суйлэсьёсыз, – музьем вылын улйсьёс;  
 кыче Инмысез Адями, сьчөөсь ик луозы Инмысь-  
 ёсыз адямиос. <sup>49</sup>Кызы асьмеос суйлэсезлэсь адя-  
 милэсь тусбуйзэ нуллймы, озы ик Инмысезлэсь  
 Адямилэсь но тусбуйзэ нулломы.

<sup>50</sup>Агай-выньёсы, тае верало тйледлы: лулмугор  
 но, вир но Инмар Эксэйлыкез люкет басьтыны  
 уг быгато. Сисьмоноез но сисьмисьтэмез люкет  
 басьтыны уг быгаты. <sup>51</sup>Тйледлы ватйськыса улйсь  
 зэмлыкез верало: асьмеос ваньмы ум кулэ, нош

ваньмы воштйськомы <sup>52</sup>туж жог, син куспын ик, берпуметй гумы куара потэм бере ик. Куке гумы куара кылйськоз, соку кулэмьёс сисьмымтэ куен султозы, – асьмеос воштйськомы. <sup>53</sup>Уго ваньмызлы сисьмисьлы сисьмонтэмлы дйсяськыны кулэ; вань кулонолы-быронолы – ноку быронтэмлы дйсяськоно. <sup>54</sup>Куке сисьмоно сисьмонтэме дйсяськиз ке, куке кулоно-быроно ноку быронтэме дйсяськиз ке, соку гожтйськем кыл быдэсмоз:

”Кулон вормемын, кулон ньылэмын”.\*

<sup>55</sup>”Кулон! Кытын тынад шиед?”

Ад! Кытын тынад вормонэд?”\*

<sup>56</sup>Кулонлэн шиез – сьöлык; нош сьöлыклен кужымез – закон. <sup>57</sup>Инмарлы тау. Кузё-Инмармы Иисус Христос пыр Со асьмелы вормон сётйз! <sup>58</sup>Озыен, гажано агай-выньёсы, юнэсь шонаськисьтэмесь луэ. Кузё-Инмарлы ужаны берекетты мед луоз. Годэлэ: Кузё-Инмар азын тйляд ужамды юнме öвöл.

## 16-тй ЛЮКЕТ

<sup>1</sup>Нош вöсяськись калык понна люкам мамалез\* озы каре, кызы мон Галат музеймысь черкёслы тупатй: <sup>2</sup>мон лыктэм бере, коньдон люканьёс медаз ни луэ шуыса, арнялэн нырысетй нуналаз

\* 15:54 Ис. 25:8.

\* 15:55 Ос. 13:14.

\* 16:1 Зеч уж лэсьтон понна калыклэн ас мылкыд каремезья сётэм коньдонэз.



тй котькудды уждундылэсь оглюкетсэ нимаз понэ.  
<sup>3</sup>Нош кукке лыктй ке, тйляд бырьем муртъёстылы,  
 гожтэтъёс сёто но кузьымдэс Иерусалиме нуыны  
 ысто. <sup>4</sup>Мыным но мыныны кылдэм ке, соос монэн  
 ёош мынозы.

<sup>5</sup>Македонияез быдэссэ орчем берам, тй доры  
 лыкто; мон али Македониятй ветлйсько. <sup>6</sup>Тй до-  
 рын, оло нош, ёжытак уло ай. Оло нош, толме  
 но пото. Кытчы ке мынй, тй мыным юрттоды  
 шуыса малпасько. <sup>7</sup>Мынам уго тйледын дыртыса  
 гинэ адзиськеме уг поты. Малпасько, Кузё-Инмар  
 эриксэ сётйз ке, тй дорын огшап улыны. <sup>8</sup>Нош  
 Ефесын мон Витьтонэтй нунал празникозь уло.  
<sup>9</sup>Отын бадзым уж нуыны мон понна паськыт ёс  
 усьтэмын, но тушмонъёс трос.

<sup>10</sup>Тй доры Тимофей лыктйз ке, учкелэ, тй дорын  
 со кошкытэк улоно мед луоз. Со уго, мон кадь  
 ик, Кузё-Инмарлы ужа-тырше. <sup>11</sup>Соин ик сое но-  
 кин но медаз ултйя. Каньыллык сйзьыса, тй сое  
 мон доры келялэ. Агай-выньёсын ёош солэсь  
 бертэмзэ возьмасько.

<sup>12</sup>Аполлос брат сярысь ке верано, мон сое туж  
 кури вал, агай-выньёсын ёош со тй доры мед мы-  
 ноз вал шуыса, нош али солэн ноказыы но мынэ-  
 мез ёз поты. Кельшымон дыр шедьтйз ке, соку  
 лыктоз.

<sup>13</sup>Сэзь улэ, осконын юн сылэ, кышкасьтэмесь,  
 кужмоесь луэ. <sup>14</sup>Ваньзэ, котьмае яратыса лэсьтэ.

<sup>15</sup>Агай-выньёсы, тйледыз курисько: тй тодйсь-  
 коды Стефанлэсь выжы-кумыоссэ, Ахаияын Хрис-  
 тос пала соос нырысь ик берытскизы но вёсясь-

кись калыклы юрттйськыса улыны кутскизы. <sup>16</sup>Тй но таё адямиослы юрттйськыса ужалэ, соослы тэрытскыса улэ. <sup>17</sup>Стефанлэн, Фортунатлэн, Ахаклэн татчы вуэмзылы мон шумпотйсько: тй өвөлтэм дыръя, тй интые соос мыным ужазытыршизы. <sup>18</sup>Соос мынэсьтым но, тйлесьтыд но духмес лөпкытйзы. Таё муртъёсты гажаны кулэ.

<sup>19</sup>Асийсь черкъёс тйледлы салам верало. Акила но Прискилла, нош озыы ик соослэн гуртазы люкаськись черк калык тйледлы христиан салам верало. <sup>20</sup>Вань агай-выньёс тйледыз зечкылало. Святой чупанэн огдэс огды зечкылалэ.

<sup>21</sup>Таиз мынам, Павеллэн, ас кийным гожтэм зечкыланэ: <sup>22</sup>кин Кузё-Инмарез Иисус Христосэз уг яраты – солы анафема мед луоз\*; маранафа\*\*. <sup>23</sup>Кузё-Инмармылэн Иисус Христослэн гажан-жалянэз тй бордын мед улоз. <sup>24</sup>Тйледын, Иисус Христос бордын вань улйсьёсын, мынам яратонэ улоз. Аминь.

\* 16:22 Люкемын-куштэмын мед луоз.

\*\* 16:22 Арамей кылын "Кузё-Инмармы, лыкты!" шуэм луэ.

